



МОНГОЛ УЛС
ГОВЬ-АЛТАЙ АЙМГИЙН
ЗАСАГ ДАРГЫН
ЗАХИРАМЖ

2020 оны 07 сарын 12 өдөр

Дугаар A/445

Алтай хот

Г Хорио цээр, хязгаарлалт
тогтоох тухай Т

Монгол Улсын Засаг захиргаа, нутаг дэвсгэрийн нэгж, түүний удирдлагын тухай хуулийн 29 дүгээр зүйлийн 29.1.5-ийн "в" дахь заалт, 29 дүгээр зүйлийн 29.2 дахь хэсэг, 32 дугаар зүйлийн 32.7 дахь хэсэг, Гамшигаас хамгаалах тухай хуулийн 4 дүгээр зүйлийн 4.1.22, 4.1.23 дахь заалт, 32 дугаар зүйлийн 32.1.1, 32.1.3, Эрүүл мэндийн тухай хуулийн 11 дүгээр зүйлийн 11.1.4 дэх заалт, Мал, амьтны эрүүл мэндийн тухай хуулийн 15 дугаар зүйлийн 15.5 дахь хэсэг, Засгийн газрын 2018 оны 266 дугаар тогтоол, Эрүүл мэндийн сайдын 2017 оны А/160 дугаар тушаал, аймгийн Онцгой комиссын 2020 оны 07 дугаар сарын 12-ны өдрийн 16 дугаар хурлын шийдвэрийг тус тус үндэслэн ЗАХИРАМЖЛАХ нь:

1. Тус аймгийн Төгрөг сумын Төгрөгийн эх багийн нутаг дэвсгэрт тарваган тахлын хүний өвчлөлийн сэжигтэй тохиолдол илэрсэнтэй холбогдуулан Алтай, Бугат, Төгрөг, Цээл, Шарга сумдын нутаг дэвсгэрт хорио цээрийн дэглэм тогтоож, эмнэлгийн яаралтай тусламж авахаас бусад тохиолдолд гадагш гарах хүн, тээврийн хэрэгслийн шилжилт хөдөлгөөнийг 2020 оны 07 дугаар сарын 12-ны өдрөөс эхлэн хориглосугай.

2. Хорио цээр, хязгаарлалт тогтоосонтой холбоотойгоор Засгийн газрын 2018 оны 266 дугаар тогтоолоор батлагдсан "Хорио цээр, хязгаарлалтын дэглэмийн үед хэрэгжүүлэх үйл ажиллагааны журам", Эрүүл мэндийн сайдын 2017 оны А/160 дугаар тушаалын дагуу холбогдох арга хэмжээг төлөвлөн хэрэгжүүлж, хяналтын цэг ажиллуулж, эрүүл мэндийн асуумжийн хуудас бөглүүлэн, хяналтын цэгт үүрэг гүйцэтгэх бүрэлдэхүүнийг шуурхай томилж нэгдсэн удирдлагаар хангаж ажиллахыг аймгийн Онцгой байдлын газар (З.Баттулга), Эрүүл мэндийн газар (Ц.Туяа), Мэргэжлийн хяналтын газар (Б.Түмэнбаатар), Цагдаагийн газар (Д.Болдсайхан), Мал эмнэлгийн газар (Д.Наянбуу) нарт тус тус үүрэг болгосугай.

3. Тарваган тахлын хүний өвчлөлийн сэжигтэй тохиолдол илэрсэнтэй

холбоотойгоор халдварт өвчинтэй тэмцэх, урьдчилан сэргийлэх чиглэлээр шуурхай арга хэмжээ авч, аймгийн Онцгой комиссыг мэдээллээр тогтмол хангаж ажиллахыг Төгрөг, Шарга, Цээл, Алтай, Бугат сумдын Засаг дарга нарт, Байгаль орчин, аялал жуулчлалын сайдын “Тарвагыг ахуйн болон үйлдвэрлэлийн зориулалтаар агнахыг түр хугацаагаар хориглох тухай” 2017 оны А/278 дугаар тушаалын хэрэгжилтийг хангаж ажиллахыг нийт сумдын Засаг дарга нарт тус тус үүрэг болгосугай.

4. Тарваган тахлын хүний өвчлөлийн сэжигтэй тохиолдлоос дээжилсэн лабораторийн шинжилгээний сорьцыг Говь-Алтай-Улаанбаатар чиглэлийн “Хүннү-Эйр” ХХК-ий онгоцоор Зоонозын өвчин судлалын Үндэсний төвд хүргүүлэхийг Зоонозын өвчин судлалын төв (С.Батсайхан)-т, Алтай нисэх буудал (Д.Батбаяр)-т тус тус даалгасугай.

5.Хорио цээр, хязгаарлалт тогтоох, тарваган тахал өвчинтэй тэмцэхтэй холбоотой мэргэжлийн байгууллагаас авч хэрэгжүүлэх үйл ажиллагааны зардлыг аймгийн Засаг даргын 2019 оны 136 дугаар захирамжаар баталсан “Гамшигийн сангийн хөрөнгийг бүрдүүлэх, зарцуулах, тайлагнах журам”-ын дагуу Онцгой комиссын хурлаар шуурхай шийдвэрлэж ажиллахыг Засаг даргын Тамгын газрын Санхүү, төрийн сангийн хэлтэс (Ч.Жаргалсайхан)-т зөвшөөрсүгэй.

6.Захирамжийн хэрэгжилтэд хяналт тавьж, Онцгой комиссын хурлыг тухай бүр шуурхай хуралдуулж, Улсын онцгой комисст мэдээлж ажиллахыг аймгийн Засаг даргын орлогч (Я.Эрхэмбаяр)-д даалгасугай.

